

مَجْلَدُ الْحَاكِمِ عَلَيْهِ السَّلَامُ

- ١٧ - قواعد كلية فقهية نك ايضاحي
١٢٩ - كتاب البيوع
٣٢١ - كتاب الاجارات
٤٦٥ - كتاب الكفالة

(محمود بك) مطبعه سى

باب على جوارنده ابوالسعود جاده سنده نومرو ۷۲

۱۳۱۸

افلاحي صبر

محترم قارئلر،

مجله شرحنه مقدمه يازمغه جرأت ايده جك قدر حدناشناس
دكلم . آنكچون بوسطرلري معاملاتنه متعلق احكام قانونيه مزك
مكملتته بو احكامك اوروپا قوانين مدينه سي احكاميله
مقايسه سنه دائر جدي بر مطالعه بولمق فكريله تعقيب ايمه ييكز
بو اثر مهمك تدقيق مجله احكام عدليه نك اساسلرني احضار
ايدن ذوات عاليه نك نه قدر بيوك بر ذكايه ، نه قدر واسع
معلوماته ونه قدر درين بر ده ايه مالك اولدق لريني اظهار
ايده جكدر . بو يابده عاجز قلملرك مطالعه بيان ايتلري پك زائد
اولور .

بو اساسلرك اوروپا احكام مدينه سيله مقايسه سنه كانجه :
بو او قدر عظيم تتبعاتي ايجاب ايدر او قدر آغير بر ايشدر كه
هنوز هيچ كيمسه درعهده ايده مامشدر . بوراده بنم عهدد
عجز وضعفه ترتب ايدن وظيفه ، وظيفه معززه و مقدسه .
مفتون كالاتي اولديغم بر استاد محترمك حيات علميه وساعيه سي
حقتنده برقاج سوز سويله مكدر . بو سوزلرك بيله بويله ابدى

بر آورده ير بولمغه لايق اولمديغنى بيليرم . فقط بونلرى بكا
سويله تن حسياتك صافيت وخالصيتي معذور كورلمكام ايجون بك
قوى برسبب تشكيل ايدر .

*
**

بوكون برنجى جلدی انتشار ایدن بو اثر اوتوز سنهك
برحيات علميهك محصول عرفان و تبعيدر . مؤلف محترمك
كرسى تدريسى اوكنده بولمق وبالخاصه كنديسنى خصوصى
اوله رق طانيق شريفه مفتخر ومباهى اولانلر بو حياتك بتون
فضائل ومزاياسنى تقدير ايدرلر ، بو اثرك نه قدر جدی برسى
ايله ، نه قدر قوى بر عزم وجهد ايله يازلمش اولديغنه واقفدرلر .
كنج دماغلرك تعليم و تربيه سى اغورنده چالشمغه ، متمادياً
چالشمغه وقف ايدلين بو حياتك سميدن ، تبعدن ، خدمتدن
بشقه بر نصيبى ، اوكرنوب اوكرتمكدن بشقه بر اندیشه سى
يوقدى .

مملكتك وجود معرفتنه دها بيوك ، بك بيوك خدمتلك
ايدجكى برسنده افول ایدن بو حياتك پينده ترك ايتديكى نام
واجب الاحترام الى الابد تبجيل و تعزير ايديله جكدر . اونك

سرمایه عرفان و کمالیدن مستفیض اولانلر آنجق بو صورته
دین شکرانلرینک پک کوچک بر جزئی اوده یه بیله جکلر در .

*

**

عاطف بک بو عصرک بیوک بر نحریری ، پک بیوک بر
معلمی ایدی . برنجیسنه اثری بر برهان قوی ، ایکنجیسنه
اعضای علمیه سی میانده بولندیغی مکتب بر شاهد علویدر .
فقط عاطف بک بوا یکی خصیصه نادره نک فوقنده اولمق اوزره
بر بیوک مزیت و فضیلتی واردی که اوده کله نک بتون قوت
معناسیله بر انسان اولسی ایدی . حیات تبعیه سنده کوچک بر
لاقیدی ، حیات تدریسی سنده کوچک بر ضعف ، حیات
مأموریتنده کوچک بر تقیصه یوقدی .

حیات تبعیه سی مملکتک بتون پرستشکاران معرفتی ،
حیات تدریسی سی بتون طلبه علم و عرفانی ، حیات انسانی سی
ایسه بتون ارباب ناموس و حمیتنی کندیسنه مفتون و مجلوب
ایلمشدی . بو محترم و معزز استادی بزم آره مزدن آبیرون او
غیر منتظر ضربه مدهشه نک نه قدر درین تأسفات و تلفاتی
موجب اولدیغی بو کون حالا اونودلما مشدر ظن ایدرم . بز ،

اونك حیران فضائل ومحاسنی اولانلر ، بونی اونوتمدق وهیچ
 بر زمان اونوتمیه جغز . بو حیاتلردن یالکز برینی صاف و پاک
 بر صورتده کچیره بیلیمک اک بیوک بر موفقیت عد اولنمغه لایق
 ایکن هپسینده نمونه تقلید و امثال اوله جق بر طریق سلامت
 و استقامت تعقیب ایلمک نه قدر شایان غبطه ، نه قدر تبجیلات
 و تقدیر آه احرادر !

محترم قارئلر ،

بو استاد فضیلت و معرفتک حیاتی حقنده بنم یازدیغ سطرلر
 حقیقت قارشیسینده پک ضعیف ، پک سونو کدر . اونک حیات
 انسانیه سنی آ کلامق ایچون کندیسینی یقیندن طانیق ، حیات
 تدریسیه سی حقنده بر فکر صحیح ایدینه بیلیمک ایچون اونک
 کریمی خطابی اوکنده ، تقریر سالیس و بلیغی قارشیسینده
 مسحور قالان طلبه سی ایچنده بولنمق لازمدی . بو ایکی عالی
 شرفه مظهر اولانلر کندیلرینی بختیار عد ایتلیدرلر . چونکه
 بو خاطره لر پک علوی ، پک قیمتداردر !

معزز ممالکتمزک بو بیوک اولادینه قارشی بزم ایفاسنه
 مجبور اولدیغمز بر دین واردر که اوده بو کون ساحه انتشاره
 چیقان بو اوردن بر خاطره شکر کذاری اولوق اوزره بر نسخه
 اخذینه شتابان اولمقدور . بویله جدی و مکمل بر اثر قارشیسندنه
 لاقید قالمالی یز . معرفتپرور ، حق شناس اولدیغمزی اثبات
 ایتلی یز . بر مملکتده آنجق یارم عصرده بر نشر ایدیله ییلن بویله
 قصورسز بر اثرک کتابجیلرک جاملری ایچنده اسکیمسنه مساعده
 ایتاملی یز .

رخصت مخصوصه سی استحصال ایدلمش اولان بو اثرک بر
 آن اول اکمال طبعی بزم رغبتمه متوقفدر . کتبخانه ملیمزک
 بویله بر اثرله بر آن اول ترینی ایچون بو رغبتی ابدال ایلملی یز .
 حتی ایچمزده مکتب شاگردانه توزیع ایتک اوزره یوز طاقم
 بردن اشترای ایتک کپی علوجناب کوسه ترنلرده بولنمیدر . بز
 نانکور اولدیغمزی آنجق بوصورتله اظهار ایده یلیرز .

مطبوعات عثمانیه یه ترتب ایدن وظیفه ده بو اثر نفیس
 ومهمک انتشارندن بتون قارئینی خبردار ایلک ایچون تمادیا
 اعلان ایلمکدر . اولاد مملکته پک بیوک خدمتلا ایدن بر ذلتک

خاطره سنه خادم مملکت عد اولتمق لازم کلن مطبوعات هر کسدن


زیاده رعایت ایتلیدر دکلی؟

بنده بوراده استاد محترم ومکر ممزک اولاد لرینه بزى بویله

بر اثرله مسعود ومستفید ایتدکاری ایچون اینفای تشکر ایدرک

سوزی کسیونم.

محمد جاوید



مجله جمعیتك مضبطه سیدر

محاط علم عالی و کالتناهیاری بیوردینی اوزره علم فقهک امر دنیایه تعلق ایدن جهتی مناکحات و معاملات و عقوبات قسملرینه منقسم اولدینی کبی ملل متمدنه نک قوانین اساسیه سی دخی بو اوج قسمة تقسیم و معاملات قسمی قانون مدنی دیو توسیم اولنور فقط بو عصر لرده معاملات تجاریه پک زیاده توسع ایلمش اولدیغندن پولیچه و افلاس کبی پک چوق خصوصارده قانون اصلیدن استتئا اولنمش و بو مسائل استثنائی بی حاوی بشقه جه برده تجارت قانوننامه سی تنظیم قلمشدر که خصوصات تجاریه ده معمول به اولوب جهات سائرده ینه قانون مدنی به مراجعت قلیور مثلاً بر محکمه تجارتده تجارت قانونی حکمنجه رؤیت اولنان بر دعوانک رهن و کفالت و وکالت کبی بعض خصوصات متفرعه سنده قانون اصلی به مراجعت اولنه یور جرائمن نشأت ایدن حقوق عادیه دعوالرنده دخی بو منوال اوزره معامله ایدیلیور قانون مدنی به مقابل دولتعلیه ده قدیماً و حادثاً پک چوق قوانین و نظامات یا بلمشدر واکرچه بونلر کافه معاملاتک فصل و تسویه سنه کافی دکل ایسه ده علم فقهک معاملات قسمی بو خصوصده اولان احتیاجاته کافی و وافیدر و دعاوینک شرع و قانونه حواله سنجه بعض مشکلات کورلمکده ایسه ده تمیز حقوق مجلسلری حکامک تحت ریاستلرنده بولنه رق امور شرعی بی شرعاً رؤیت ایتدکلری کبی مجالس تمیزده نظاماً رؤیت اولنان ماده لر دخی آنلرک معرفتیه فصل و بو مثللو مشکللر حل اولنمقده در شوقدر که قوانین و نظامات ملکینه نک اصل و مرجعی علم فقه اوله رق نظاماً رؤیت اولنان موادک دخی نیجه خصوصات متفرعه سی مسائل فقهیه به تطبیق ایله فصل و حسم اولنه کلوب مجالس تمیز اعضاسی ایسه مسائل فقهیه به مطلع اولمدقلرندن کویا حاکم افندیلر قوانین و نظامات موضوعه نک خارجنده اوله رق مراجعاتی استدکلری قابله دوکه یورلر نظریله باقوب بر

طاقم سوء ظنلره ذهاب ايله كفتكويه باعث اوله يورلر . دولت عليه نك تجارت محكمه لرنده دخى تجارت قانوننامه هايونى دستورالعمل اولوب دعوانك تجارته تعلق ايتيان خصوصات متفرعه سنده عظيم مشكلات چكلمكده در شويلاه كه : اوروپا قانونلرينه مراجعت اولنسه چونكه بونلر باراده سنيه موضوع قوانين اولديغندن محاكم دولت عليه مدار حكم اوله ماز شرعه حواله اولندقدده دخى محاكم شرعيه او مثللو خصوصات متفرعه ده مرافعه بي اساسندن طومتغه مجبور اولور . حالبوكه ايكي محكمه نك اصول محاكمه سي اساساً مختلف اولديغندن بالطبع ايشده چتاللق پيدا اولدينى جهته بو مثللو خصوصاتده محاكم تجارتدن محاكم شرعيه مراجعت ايديله ميور محاكم تجارت اعضاسى كتب فقهيه مراجعت ايتسون دينلورسه بو دخى قابل دكسدر زيرا فن فقهه انتساب خصوصنده آنلر دخى مجالس تمييز اعضاسيله هم حالدر علم فقه ايسه بر بحر بي پايان اولوب بوندر درر مسائل لازمه بي استنباط ايله حل مسئله ايد بيلمك خيلدن خيلي مهارت و ملكيه موقوفدر على الخصوص مذهب حنفى اوزره طبقات متفاوتده پك چوق مجتهدلر كلوب اختلافات كثيره وقوعبولمش و فقه حنفى فقه شافعى كبي تنقيح ايديله ميوب پك متشعب و متشخت اولمشدر ايشته بونجه اقوال متخالفه ايچنده قول صحيحى تمييز ايله حوادنك اكا تطبيقنده عظيم عسرت واردر قالدিকে تبدل اعصار ايله عرف وعادته مبتى اولان مسائل فقهيه دخى تبدل ايدر . مثلاً قدامى فقها عندنده اشتر اولنه جق خانه نك بر او طه سنى كورمك كافيدير و متأخرين عندنده هر او طه سنى كورمك لازمدر بو ايسه عن دليل براختلاف اوليوب بلكه انشآت حقدده عرف وعادتك اختلافتدن نشأت ايتمشدر كه مقدما خانه لرك هر او طه سى بر طرز اوزره ياييله كلديكندن بر او طه سنى كورمك سائرنى كورمكدن مغنى ايمش مؤخرآ خانه لرك او طه لرى مختلف يابلقم عادت اولديغندن هر او طه سنى كورمك

لازم کلمشدر حقیقت حالده لازم اولان کیفیت ایسه مقصد شرابه کوره بر علم کافی حاصل ایتمکدن عبارت اولمسیله اصل قاعده شرعیه تعیرا تیموب فقط بونک حواده امر تطبیقی تبدل احوال زمان ایله تبدل اییدیور بو مثلواختلاف زمانی ایله اختلاف برهانی بینی فرق و تمیز ایتمک دخی خبیلی دفته محتاجدر مسائل فقهیه بی احاطه ایله غورینه اطلاع ایسه پک کوچدر و برارلق مسائل فقه حنفی جمع واحاطه ایتمک اوزره عصرک فقها و فضلاسی جمع ایدیله رک تاتار خانیه و فتاوی جهانگیریه کبی کتابلر تألیفنه همت اولمش ایسه دینه بالجمله فروع فقهیه و اختلافات مذهبه حصر واحاطه ایدیله مامشدر و فی الواقع کتب فتاوی حوادثک قواعد فقهیه به تطبیقنه دائر ویرلمش اولان فتوالری حاوی مؤلفات دیمک اولوب حالبوکه بونجه عصر لر دنیرو سادات حنفیه طرفندن ویرلمش اولان فتاوانک جمع واحاطه سی نقدر دشوار اولدیغی محتاج بیان دکلددر بناء علیه (ابن نجیم) بر طاقم قواعد و مسائل کلیه بی جمع ایدرک بونلرک تحتنده فروع فقهی علی وجه الاحاطه درج ایلمک یولنده بر کوزل چغیر آچمش ایسه دهن آندن صکره کی عصر لرک عالم وفقیه یتشیدیر مک یولنده اولکی سماحتی کوریه مدیکندن آنک اثرینه اقتفا ایله آچمش اولدیغی چغیری شاهراه ایده بیه جک ذاتلر ظهوریه بو یولده بذل جهد ایلملرینه مساعد اولمامشدر و شمده ایسه هر طرفده علوم شرعیه ده مهارتلو ذواته ندرت کلدیکندن محاکم نظامیه ده لدی الايجاب کتب فقهیه به مراجعتله حل شبهه ایده بیه جک اعضا بولندر مق شویله طورسون ممالک محروسه ده کائن بوقدر محاکم شرعیه به کافی قضات بولمق مشکل اولمشدر .

بناء علی ذلك اختلافات دن عاری ویا لکنز اقوال مختاره بی حاوی اولمق اوزره معاملات فقهه دائر سهل المأخذ بر کتاب یا پلسه هر کس قولایلقله مطالعه ایدرک معاملاتنی اکا تطبیق و بویله مضبوط بر کتاب اولدیغی حالده

نائب افنديلره عظيم فائدهسى اوله جنى كى مجالس نظاميه اعضاسيله امر اداره ده بولنان مأمورين دخى بالمطالعه مسائل شرعيه به انتساب ايله لدى الايجاب ايشلر نى وسعلرى مرتبه شرعشريفه توفيق ايدرلر وهم محاكم شرعيه ده معتبر ومرعى وهمده مجالس نظاميه ده حقوق دعوالرى ايچون قانون وضعندن مستغنى اولور مطالعه سنه مبنى اويله بر اثر جليلك وجوده كلمسى خيلى وقتدن برو آرزو اولنور بر كيفيت اولوب حتى بونك ايچون مجلس تنظيمات دائره سنده بر جمعيت علميه تشكيل ايدلمش و خيلىجه مسائل يازلمش ايكن حيز فعله كله ميوب بودخى (الامور مرهونه باوقاتها) حكمنجه تاسيسى اهم اولان بر چوق مواد خيريه كى مغبوط اعصار اولان عصر محاسن حصر هايونه قالمشدر .

موفقيت جليله حضرت پادشاهى ثمره فيض بهره سى اوله رق مشاهد عين افتخار اولان بونجه آثار حسنه صره سنده بودخى حصوله كلك اوزره علم فقهين عصرك احتياج اتنه كوره روز مره ظهوره كلن معاملاتك تطبيقه كافي اوله بيله جك اويله بر اثر خيرك وجوده كتير لمسى امر اهي عاجز لرينه حواله بيورلمش اولديغندن بر موجب اراده عليه ديوان احكام عدليه دائره سنده بالاجتماع فقهك معاملات قسمندن كثير الوقوع ومعاملات عصره كوره بديهي اللزوم اولان مواد حقه سادات حقيه نك اقوال معتبره سى جمع ايديله رك متعدد كتابلره تقسيم واحكام عدليه اسميله توسيم اولنق اوزره بر مجله ترتيبه بالابتدار مقدمه سيله كتاب اولى ختام بوله رق بر نسخه سى ذات حقايق آيات حضرت فتوا پناهي به ويرلديكي كى علم فقهده مهارت ومعلومات كافيه سى اولان ديكر بعض ذوات فخرامه دخى برر نسخه سى بالاعطا اولنان اخطارات اوزرينه تعديلات لازمه اجرا اولندقدن نصكره تببيض ايله حضور حقايق ظهور وكالت پناهي لرينه عرض اولندي بونك لسان

عربی به نقل و ترجمه سی در دست اولدینی کبی دیکر کتابلر دخی جمع و تألیف اولنق اوزره در .

بالمطالعه محاط علم عالی بیوریلورکه مقدمه نك ایکنجی مقاله سی (ابن نجیم) ایله آنک مسلکنه سالک اولان فقهانک جمع ایلدکری قواعد فقهیه اولوب حکام شرع بر نقل صریح بولمقجه یالکز بونلرله حکم ایده من لکن مسائل فقهیه نك الضباطنه کلی فائده لری اوله رق ارباب مطالعه مسائلی ادله سیله ضبط ایتمش اولورلر و مأمورین سائره یه هر خصوصده مرجع اوله بیلور و بونلرله بر آدم معاملاتتی مهما امکان شرعه توفیق و تقریب ایده بیلور بناء علیه کتاب یا خود باب عنوانیله یازلیوب مقدمه یه درج اولنشد .

کتب فقهیه ده اکثر یا مسائل ایله مبادی مخلوط اوله رق ذکر اولنمش ایسه ده بو مجله ده هر کتابه متعلق اولان اصطلاحات اول کتابک مقدمه سی اولق اوزره ذکر اولنمق مسائل سازجه ترتیب اوزره یازیلوب فقط بو مسائل اساسیه یی ایضاح ضمننده مثال اوله رق کتب فتا وادن بر خیلی مسائل درج و علاوه اولنمشدر فی زماننا جریان ایدن اخذواعطا اکثر یا بعض شرائطه مربوط اولوب مذهب حنفی ده ایسه صلب عقده در میان اولنان انواع شرائطک اکثری بیعی مفسد اولدینی جهته کتاب البیوعک الک مهم مبحثی (بیع بالشرط) فصلی اوله رق جمعیت عاجزانه مزجه پک چوق بحث و مناظره یی موجب اولدیغندن مباحثات جاریه نك خلاصه سی بوجه آتی ایراد اولنمق مناسب کورلشددر (بیع بالشرط) حقنده اکثر مجتهدینک اقوالی یکدیگره مخالفدر مذهب مالکی ده مدت جزئیه ایچون و مذهب حنبلی ده علی الاطلاق بائع کندوسی ایچون میعهده منفعت مخصوصه شرط ایده بیلور لکن بائعهده بو صلاحیت اولوبده مشتری طرفنده اولماسی رأی و قیاسه مخالف کورونیر امام اعظم رحمة الله علیه حضرت تریله هم عصر

اولوبده مؤخرأ اتساعی منقرض اولان مجتهدلردن (ابن ابی لیلی) ایله
 (ابن شبرمه) رحمة الله علیهما حضرتینی دخی بوخصوصده یکدیگره ضد
 تام اوله رق برر رأیده بولنمشلردر شویله که : ابن ابی لیلی عندنده علی العموم
 بیع و شرط فاسد و ابن شبرمه عندنده علی الاطلاق هم بیع جائز و همده شرط
 جائزدر مذهب ابن ابی لیلی (المسلمون عند شروطهم) حدیث شریفنه
 مبین کورونیر ابن شبرمه مذهبی بو حدیث شریفه تمامیله موافق ایسه ده
 بائع و مشتری اجراسی جائز و قابل اولیمان شرطلر درمیان ایده بیلوب
 شرطه رعایت ایسه بقدر الامکان اولمق فقها عندنده مسلماتدن اولمسلیله
 شرطه رعایت مسئله سی تخصیص و استتنا قبول ایدر برقاعده در بناء علی ذلک
 مذهب حنفی ده بر طریق متوسط اتخاذا اوله رق بیعک شرائطی (جائز)
 و (مفسد) و (لغو) دیو اوج قسمه تقسیم اولنمشدر شویله که : عقد
 بیعک مقتضاسندن اولیوب یاخود مقتضای عقد بنعی تأیید ایتمیوبده احد
 طرفینه نافع اولان شرط مفسد و اکا معلق اولان بیع فاسد اولور و بر
 طرفه نفعی اولیمان شرطله بیع صحیح و شرط لغودر زیرا بیع و شرادن
 مقصد تملیک و تمکک خصوصی یعنی بالامانع و مزاحم مشتریک میعه و بائعک
 ثمنه مالک اولمی کیفیتیدر حالبوکه بر طرفه نافع اولان شرطک اجراسنی
 اول طرف طالب و طرف آخر آندن هارب اوله رق منازعه یه مؤدی
 اوله بیلور . بوصولده ایسه عقد بیع تمام اولمامش دیمک اولور فقط
 عرف و عادت منازعه یی قاطع اولدیغندن علی الاطلاق شرط متعارف ایله
 بیع تجویز اولنمشدر . معاملات تجاریه بوجه مشروح ذاتاً مستثنا برحاله
 اولوب اصنافک اکثریسنده دخی برر معامله متعارفه تقرر ایتدیکنه
 و عرف طاری معتبر اولدیغنه نظر افسادی موضوع بحث اوله جق یالکنز
 برطاقم متفرق و منشتت آلیش و یریش ایدنلرک خارج از عرف و عادت
 ایتدکری شرطلر قالب بونلرک دخی چندان دکری و بحث کتورور یری

اولدیغندن معاملات عصرک تیسیری ایچون مذهب حنفی نك خارچنده اوله رق ابن شبرمه مذهبک اختیاری مناسب کورلیوب سائر فصللرده اولدینی کبی باب اولک دردنجی فصلنده دخی مذهب حنفی اوزره بیعی مفسد اولمان شرطک بیانیه اکتفا اولمشدر .

الحاصل بوجلهده مذهب حنفینک خارجه چیقلمیوب مواد مندرجه - سنک اکثری الحاله هذه فتواخانهده معتبر ومعمول به اولدینی جهته بونلر حقنده بحته لزوم کورولمز فقط ینه فقهای حنفیه دن بعض فحول ائمته نك اقوال معتبره سی ناسه ارفق ومصلحت عصره اوفق اولق حسبله اختیار اولمش ایدوکندن بونلرک مأخذ مقبوله واسباب موجه سی بروجه آتی بیان اولنور یوزطقسان یدنجی وایکیوز بشنجی ماده لر موجهیجه معدومک بیعی صحیح دکلدر حالبوکه کل وانکینار کبی شکوفه وسبزه ومیوه محصولاتی متلاحق الورود اوله رق بعض افرادی ظهور ایتمدن دیکر بعض افرادی حصوله کلوب کچر اولدینی جهته اکثریا بومثلولرک ظهور ایتمش وایده جک اولان محصولاتی طوبدن اوله رق صایلمق عرف وعادت اولمشدر وبو مثللو محصولاتده موجوده تبعاً معدومک دخی برابر اوله رق طوبدن صایلمسنی (امام محمد بن حسن الشیبانی) رحمة الله علیه حضر تلی استحسانا تجویز بیورمش و (امام فضلی) و (شمس الائمة الحلوانی) و (ابوبکر بن فضل) رحمة الله علیهم آنک قولیله افتا ایتمش اولدقلرندن وناسی بومثللو عرف وعادتلرندن کچورمک قابل اوله میوب حالبوکه معاملات ناسی فساده نسبتدن ایسه مهمما امکان صحته حمل ایتمک اولا اولدیغندن بو مجله ده دخی قول محمد بالترجیح ایکیوز یدنجی ماده آکا موافق اوله رق یازلمشدر (صبره) مسئله سنده مثلاً کیله سی شوقدر غروشه اولق اوزره بر یغین بغدادی صایلدقده (امام اعظم) رحمة الله علیه حضر تلی نك عندنده یالکنز برکیله سی حقنده بیع صحیح اولور و امامین

رحمة الله عليهما عند زنده اول ييغين تماماً صانلمش اوله رق قاچ كيله چيقارسه آكا كوره نمنی و يرلمك لازم كلوب معاملات ناسی تيسير ايتك حسييله صاحب هدايه كي نيجه فقها دخي بو خصوصه آنلرك قولنی اختيار ايلمش اولدق لرندن ايكيوزيكر منجي ماده اول منوال اوزره تحريرقلمشدر امام اعظم حضرتلرينك عندنده خييار شرطك مدتی اوج كوندن زياده اوله ميوب امامين عندنده ايسه هر قاچ كون مقاوله اولنورسه جائز اولديغنه و بو خصوصه دخي آنلرك قولی حال و مصلحته اوفق كورلديكنه مبنی اختيار اوله رق اوچيوزنجي ماده ده مدت مطلق اوله رق درج اولنمشدر خييار تقدده دخي بو اختلاف جاري اولوب بونده مدتك اطلاق خصوصه (امام محمد) عليه رحمة الصمد حضرتلری منفرد ايسه ده مصلحت ناسه اوفق اولمق حسييله آنك قولی اختيار اوله رق اوچيوز اون اوچنجي ماده ده دخي فلان وقته قدر ديو مدت اطلاق اوزره بر اقلمشدر. امام اعظم حضرتلرينك عندنده استصناعاً منعقد اولان بيعدن مستضع رجوع ايده بيلور ايسه ده امام ابو يوسف رحمة الله عليه حضرتلرينك عندنده مصنوع تعريفه موافق اولديغنی حالده رجوع ايده مز. شمعی ايسه عالمده يك چوق كارگاهلر ياپيله رق بونجه طوپلر و تفنكلر و واپورلر مقاوله و سپارش ايله ياپديريله كلوب استصناع كيفيتي مصالح جسيمه جاريه دن اولسيله مستضعك عقداستصناعی فسخرده مخير اولسی نيجه مصالح جسيمه بي اخلال ايده جكندن و استصناع خصوصی خلاف قياس اوله رق عرف ناسه مبنی استحساناً مشروع اولان سلمه مقيس و عرفه مستند بر كيفيت اولديغندن مصلحت عصره نظراً امام ابو يوسف قولنك اختياريه لزوم كوريله رك اوچيوز طقسان ايكنجي ماده آكا موافق اوله رق يازلمشدر . مسائل مجتهد فيهاده امام المسلمين حضرتلری هر قنغی قول ايله عمل اولمق اوزره امر ايدرسه موجه نيجه عمل اولمق واجب اولديغندن معروضات

مبسوطه نزد حقایق وفد وکالتپناهیارنده دخی قرین تصویب بیورلدینی
حاله مجلهٔ ملفوفه نك بالاسی خطهایون حضرت خلافتپناهی ایله توشیح
بیورملق باینده .

فی ۸ ذی الحجّه سنه ۲۸۵ و فی ۱۰ مارت سنه ۲۸۵

عن اعضاء شورای دولت سیف الدین	مفتش اوقاف هایون سید خلیل	ناظر دیوان احکام عدلیه احمد جودت
عن اعضاء شورای دولت محمد امین	عن اعضاء دیوان احکام عدلیه سید احمد حلبی	عن اعضاء دیوان احکام عدلیه سید احمد خلوصی

عن اعضاء جمعیت ابن طابدین زاده
علاء الدین

